

«Scià Scindico, st'anno chi voêmo parlâ de quelle cöse che son li ascordæ da troppo tempo.

'Na votta in faccia a-a Staçion Maritima gh'ea o monumento dedicou a-o Rafele De Ferrari ducca de Galliera: l'avian levou ciù de vint'anni fa; ciù votte i giornali an dito ch'o l'é acogou inte 'n magazin comunale a San Chigo ò a Bösanæo: o gh'é staiâ ancon pe goæi? Quande o saiâ misso a posto?

E poi comme no parlâ da Tore di Enbriaci: l'é za 'n bello pö de anni che 'n furrine o gh'a arancou 'n merlo: cöse s'aspetta pe agiustala? E magari pe rendila vixitabile?

Pe restâ inti caroggi, m'an dito che inti depoxiti do Comun gh'é 'n vegio treuggio. Perchè no metilo inta Ciassa de Bugaixe (piazza delle Lavandaie), li de derê a Porta Soprana? Dæto o nome da ciassa o no ghe staieiva manco mâ.

Scià me lasce spostâ in San Viçenso. Li gh'é a Montâ da Mizericordia. Ben, a l'é stæta serâ chisà quande e a l'é ancon serâ: oua a l'é pinn-a d'erbassa e de canigiæa. Perchè a no vegne averta?

Parlemmo oua de via Vinti Setembre: a stradda ciù inportante de Zena. Ma l'é mai poscibile che no s'ariesce a levâ tutti quelli manifestin che inciastran e colonne da stradda? Inte tanti gh'é scinna un numero de telefono: no se peu intervegnî e fa 'n moddo che-e colonne posan arestâ belle nette?

E senpre in via Vinti gh'é ben ben de personn-e (e tra de liatre gh'é di zoeni ascì) asetæ pe tæra a domandâ a limöxina a-a gente. Ma i serviççi sociali do Comun non peuan intervegnî? S'a l'é gente ch'a l'à de bezeugno dovieivan intervegnî pe dâghe in pö de rescioo, e se son de legere pe levâli da pe-a stradda a angosciâ chi passa.

Comme chi davanti a Paxo, scià mò-u fasse dî, gh'é de longo 'n muggio de zoeni a tørsio che stan asetæ in scî scæn verso ciassa De Feræ che quæxi no s'ariesce a intrâ. E quande mangian e beivan, lascian tutto li pe tæra! E semmo into centro da çitæ!

Pe urtimo o lasciou i outobo: ghe n'é pochi e quelli pochi son pin comme-e arbanelle d'ancioe sotta sâ! Comme se peu pensâ de reduê o trafego privou se i mezzi pubblici no son adegoæ? E chi sata in ballo a metropolitann-a che, se dixè, a segge a ciù curta e a ciù caa do mondo. Oua a metropolitann-a a l'é o megio mezzo pe mesciase in çitæ: se ceuve un o no se bagna e o trafego de stradde o no da fastidio a-i treni che coran de sotta. Perchè no fâ 'na bella metropolitann-a da Votri a Nervi e inte doe valadde do Bezagno e da Ponçeivia? Manca i dinæ? Beh, perché no ricorri a-o "project financing"? (scià me scuziàn se l'ò dito zeneize streito).

Scià Scindico, oua o balin scià ghe l'à 'n man Voscià: mi no sillo ciù e staggo a sentîla.

Scignoriâ a Voscià e a tutti. Pe Zena e pe San Zorzo!»

• • • • •

Inta seu replica, a scià Scindico a l'à dito che a no sa dov'ò segge ezatamente o monumento do De Ferrari. Niatro pe fortun-a ou semmo! Pe dî a veitæ, chi o sa o l'é o nostro consultô G.B. Oneto, ch'ò scriviâ 'na breve relaçion da fâ avei a-a Scindico pe vedde se se riesce a fâ rimette quello monumento a-o seu posto. D'atra parte travagiâ pò-u ben de Zena o l'é un di scopi da Compagna.



NELLE FOTO

A pag. 2 - l'arrivo a Palazzo Ducale del nostro Gonfalone.

A pag. 3 - in alto, Salone del Maggior Consiglio di Palazzo Ducale, la nostra vice presidente Maria Vietz rivolge il consueto e garbato mugugno in rime alla signora Sindaco.

In basso, sulla piazza antistante il Palazzo Ducale la signora Sindaco accende il cespò d'alloro che rappresenta il Confeugo.